

Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 2, 20. januar 2017-imeersoq Atuussimasoq (Historisk)

Efterskolit pillugit inatsisartut inatsisaanni nr. 13-imi, 5. december 2008-meersumi § 20, imm. 2 Inatsisartut inatsisaatigut nr. 17, 3. december 2012-imeersukkut allanngortinneqartoq naapertorlugu makku aalajangersarneqarput:

Kapitali 1

Tapiissuteqariaatsit tapersiissutillu

§ 1. Ilinniartitaanermit Naalackersuisoqarfik tapiissuteqartarpoq makkununga Danmarkimi efterskolimiinnernut atatillugu:

- 1) Angajoqqaat akiliutaannik appaanissamut.
- 2) Atuarnerup aallartilerneranut ilinniarunnaarnermullu atasumik Kalaallit Nunaanniit utimullu atuartup angalaneranut.
- 3) Atuartup angalanerminut atasumik pisariaqartunik unnuisarnerinut.
- 4) Atuartup angalanermini pisariaqartitsineq naapertorlugu nerisaqarneranut.
- 5) Qanigisap napparsimarulunneranut toquneranulluunniit atasumik Kalaallit Nunaannut utimullu atuartup angalaneranut.
- 6) Angajoqqaatut oqartussaassuseqartut Danmarkimut utimullu angalanerannut, atuartup napparsimarulunnerani toquneraniluunniit.
- 7) Misissuiartorluni angalaneq timikkut imaluunniit tarnikkut innarluutilimmit atuartumit aamma taassuma ikiortaanit, tamatumani aamma assersuutigalugu ilaqutaanit, inummit ineqarfimmi attaveqaataasumit, ingerlatsivimmit assigisaanilluunniit, takuuk § 2.
- 8) Atuartunut immikkut pisariaqartitsisunut ikiorsiissutinut, takuuk § 3.

Imm. 2. Qanigisatut, takuuk imm. 1, nr. 5, paasineqassapput qatanngutit, aapparisaq, qitornat, angajoqqaat aamma aanaakkut /aataakkut. Pisuni immikkut ittuni Ilinniartitaanermit Naalackersuisoqarfiup inuit allat aamma ilaquuttat qanigisatut isigineqarsinnaanerit aalajangersinnaavaa.

§ 2. Misissuiartorluni angalanermit, takuuk § 1, imm. 1, nr. 7, tapiisoqartarpoq, atuartup immikkut ittumik pisariaqartitsisunut efterskolip sorliup naapertuunnerpaanerani paasiniaanissamut.

Imm. 2. Misissuiartorluni angalanermit ilaassaaq ilaqutariinnut attaveqaataasinnaasunut pulaarneq, atuartup efterskolernerani suleqatigiinnissamut tunngatillugit ataatsimoorussamik ilimagisaasut qulaajarnissaat siunertaralugu.

Imm. 3. Atuartoq timikkut imaluunniit tarnikkut innarluuteqartoq tassaavoq, inunnut annertuumik innarluutilinnut ikiorsiinnermut inatsimmi atuuttumi pineqartoq.

§ 3. Atuartunut immikkut pisariaqartitsisunut, tak. § 1, imm. 1, nr. 8, ikiorsiissutinut ilaapput

ingerlassat atuartup immikkut pisariaqartitaanik aallaaveqarlutik atuartup iluatsitsisumik efterskolimiinnissaanut tapertaasinnaasut. Ikorsiissutit suussusissaat annertussusissaallu Ilinniartitaanermut Naalackersuisoqarfimmut qinnuteqartoqareerneratigut aningaasaliiffigineqartassapput.

§ 4. Aningaasanut inatsimmi aningaasaliissutaasut iluanni Ilinniartitaanermut Naalackersuisoqarfik atuartut naalackersuisoqarfiup aaqqissugaanik angalasut Københavnimut apuunnerminni isumagineqarnissaannut, kiisalu efterskolernerup aallartinneranut atasumik ilisarititsilluni piareersaallunilu pikkorissaanernik ingerlatsinernut aningaasartuutunik matussusiisinnaavoq.

§ 5. Aningaasanut inatsimmi aningaasaliissutaasut iluanni Ilinniartitaanermut Naalackersuisoqarfik makkununga akiliussigallarsinnaavoq:

1) Atuartut efterskolit ammanerisa avataanni ilaqtariinnit attaveqaataasunit allanilluunniit angajoqqaanit taamaaliornissamut pisinnaatinneqarsimasunit isumagineqarsinnaanngitsut inissinneqarallarnernut.

2) Taamaatinnermi akiliummut, takuuk § 16, imm. 1, taamaattorli annerpaamik 8.000 kr.nik.

Imm. 2. Imm. 1 malillugu naalackersuisoqarfiup aningaasartuutai tamatuma kingorna atuartumut angajoqqaatut oqartussaassusilinnut akileeqqusissutikkut akiligassanngortinneqassapput.

§ 6. Ilinniartitaanermut naalackersuisoqarfiup aningaasaliissutaasut iluanni Danmarkimi efterskolini atuartut tamarmik ilinniarnissamik ilitsersorneqarnissaannut aningaasartuutit akilissavai.

Kapitali 2

Tapiissutit annertussusaat

Efterskolimiinnerup akilernissaanut tapiissutit

§ 7. Naalackersuisut tapiissuteqartarput Danmarkimi efterskolimiinnermut angajoqqaat akiliutissaasa appartinnissaanut. Tapiissutit akilerneqassapput pineqartut Naalackersuisunut qinnuteqaataat tunngavigalugu.

Imm. 2. Isertitat tunngaviusussat tassaapput angajoqqaatut oqartussaassuseqartut ataatsimut akileraarutissatut isertitaat akileraaruteqaataasussanit ilanngaataqanngitsut, qinnuteqarnerup nalaani qaammatini kingullerni 12-ineersut (piffissami pineqartumi isertitat), taamaattoq takuuk imm. 6-8 aamma § 32, imm. 1.

Imm. 3. Ukiumoortumik aningaasanut inatsisitigut aalajangersarneqartarput annertussusissat isertitat piffissami pineqartumi atuuttut aamma tapiissutitut akiliutaasussat.

Imm. 4. Aalajangersaasoqartassaaq isertitat tunngavigineqartussat appartinneqarnissaannik atuartuusumut qatanngutaasut 18-it inorlugit ukiulinnut efterskolerluni aallartinnermi.

Imm. 5. Aalajangersarneqarsinnaavoq isertitanut appasissunut tamakkiisumik angajoqqaat akiliutissaasa akilerneqartarnissaat.

Imm. 6. Angajoqqaatut oqartussaassuseqartut avissimappata imaluunniit averusersimappata, isertitat tunngavigineqartussat tassaassapput meeqqamut angajoqqaajusup meeqqap najugaqarfigisaata isertitai, tapiissutissat naatsorsorneqarneranni. Tamanna aamma atuutissaaq naak meeraq angajoqqaamini arlariinni piffissami naligiissumi najugaqartaraluarpuunniit.

Imm. 7. Angajoqqaatut oqartussaassuseqartuq atuartup najugaqarfigisaa inummik allamik inooqateqarpat, inooqataasup isertitai isertitat tunngaviusussat naatsorsorneqarneranni ilanngunneqassapput tapiissutissat naatsorsorneqarneranni, inooqatigiinneq aappariinneruppat imaluunniit aappariinnermut assingusuuppat, aammalu piffissami qinnuteqarfiusumi ukioq ataaseq sinnerlugu sivisussuseqarsimappat.

Imm. 8. Atuartuq angajoqqaatut oqartussaassuseqartumik peqanngippat, isertitat 0 kr.-inik annertussuseqartinneqassapput, tapiissutissat tunngaviusussat naatsorsorneqarneranni.

Imm. 9. Angajoqqaatut oqartussaassuseqartut isertitaat piffissap tapiissuteqarfiusartup iluani malunnaatilimmik appariarpata, tamatumunnga qinnuteqarneq tunngavigalugu tapiissutissat naatsorsoqqinneqarsinnaapput. Qinnuteqaat uppernarsaaserneqassaaq isertitat appariarsimanerannut tunngaviusunik. Isertitat tunngavigineqartussat tamatuma kingorna naatsorsorneqassapput qaammammut isertitat piffissami pisumi atuuttut nutaat 12-imik gangerlugit. Naatsorsueqqinneq tapiissutit qaffanneqarnerannik kinguneqarpat, tapiissutinik pisartagaqartuq pisussaavoq Ilinniartitaanermut Naalakkersuisoqarfik nalunaarfigissallugu isertitat malunnaatilimmik qaffassimappata.

Angalanerup akilerneqarnissaanut, ineqarnermut aamma nerisaqarnermut tapiissutit

§ 8. Atuartup imaluunniit angajoqqaatut oqartussaassuseqartut angalanerannut aningaasartuutitut tapiissutit, takuuk § 1, imm. 1, nr. 2, 5 aamma 6, akilerneqartarput pisortat angallassissutaanni akikinnerpaami aningaasartuutitut tamarmiusunut naapertuuttumik.

Imm. 2. Angallassissut alla atorneqarpat aningaasartuutit qaffasinnerpaamik matussuserneqassapput pisortat akikinnerpaamik angallassisarneranni akiusunut naapertuuttumik. Angallaviusumi pineqartumi pisortat angallassissutaannik peqanngippat, taava akiliisoqassaaq qaffasinnerpaamik pisortanit akuerineqartunut angallassissutinut akiusut appasinnerpaat akuerisaasut naapertorlugit.

Imm. 3. Angalanermit aningaasartuutit isumaginninnermut oqartussaasunit atuartumut akilerneqartut, inunnut annertuumik innarluutilinnut ikiorsiisarnermut malittarisassat atuuttut naapertorlugit, imaluunniit meeqqanut inuusuttuaqqanullu malittarisassat atuuttut naapertorlugit angerlarsimaffiup avataani inissitaasunut, utertillugit akilerneqassapput imm. 1 aamma 2-mi killiliussat aalajangersarneqartut iluanni.

§ 9. Misissuiartorlutik angalanermit tapiissutit, takuuk § 1, imm. 1, nr. 7, akilerneqartassapput Danmarkimut utimullu pisortanit aaqqissuussanut akikinnerpaamik angalanermit aamma pulaakkanut tamakkiisumik aningaasartuutaasunut, taamaattoq qaffasinnerpaamik katillugit 30.000 kr.-iusunik timikkut imaluunniit tarnikkut innarluutilimmut atuartumut angalaqataanullu.

Imm. 2. Ilinniartitaanermut Naalakkersuisoqarfik aningaasaliissutissanut killiliussaasumik saneqqutsisinnaavoq, pissutsit immikkut ittut tamanna pisariaqartippassuk, tamatumani aamma najugaqarfiup sumiiffiata sumiinnera pissutigalugu angalaneq annertuumik akisunerulersimappat.

§ 10. Atuartup pisariaqartumik angalanermini unnuisariaqartarneranut aningaasartuutit, takuuk § 1, imm. 1, nr. 3, aningaasartuutinik tamakkiisunik akiliinikkut tapiiffigineqartassapput.

Imm. 2. Angalanerup allanngorneratigut atuartumut pissutsinik tunngaveqanngitsumik pisunut, immikkut tassangaannartumik ineqartinneqarnissaq pisariaqalerpat, Ilinniartitaanermut

Naalackersuisoqarfiup ineqarfigisassaq ineqarnermilu aningaasartuutissat akuerereersimassavai inissiisoqannginnerani.

§ 11. Atuartup angalaneranut atatillugu pisariaqartumik nerisaqarnissaanut tapiissutit, takuuk § 1, imm. 1, nr. 4, tunniunneqartarput najugaqarfigisami nerinermut allagartatut.

Imm. 2. Ineqarfigisaaq nerinermut allagartanik tigusineq ajorpat, nerisaqarnermut tapiissutit tunniunneqassapput angalareernermi aningaasartuutigisimasanut uppernarsaatinik tunniussisoqarpat nerinernullu ataatsimut 100 kr.-it tapiissutaassallutik.

Imm. 3. Angalanerup ingerlanerani atuartup pisuussutiginnisaanik allannguisoqarneratigut nerinissaaq pisariaqalersimappat, nerisaqarnermut tapiissuteqartoqassaaq angalareernermi aningaasartuutigisimasanut uppernarsaatinik tunniussisoqareerpat, nerinernullu ataatsimut 100 kr.-it tapiissutaassallutik.

Kapitali 3

Tapiissutisinissamut piunasaqaatit

§ 12. Tapiissutisisinnaanermut makkua naammassineqarsimassapput:

- 1) Atuartoq aamma angajoqqaatut oqartussaassuseqartut efterskolimiinnerup aallartinnerani Kalaallit Nunaanni najugaqavittuussapput, Kalaallit Nunaannilu minnerpaamik ukioq ataaseq najugaqarsimassallutik efterskolimiinnerup aallartinnginnerani. Kalaallit Nunaata avataani najugaqarnertut naatsorsuutigineqanngillat, taamaallaat ilinniarnissaaq isumaginninnerluunniit pissutigalugu Kalaallit Nunaanni oqartussat peqataaffigisaannik najugaqarnerit.
- 2) Atuartoq efterskolimiinnerup aallartinnerani ukiuni 8-ni meeqqat atuarfianni atuarnermik naammassisaqarsimassaaq, imaluunniit 14-inik ukioqalereersimassalluni, 18-inilli ukioqalereersimassanani.
- 3) Atuartoq efterskolimi Danmarkimi ilinniartitaanermut ministerimit akuerisaasumi ilinniartussatut akuerineqarsimassaaq, takuuk § 13. Atuartoq angerlarsimaffiup avataani inissitaaq, takuuk § 17, efterskolimi Danmarkimi oqartussaasut meeqqanik inissitanik ilinniartoqarsinnaasutut akuerisaanni ilinniarsinnaanermut neriorsorneqarsimassaaq, takuuk § 13.
- 4) Atuartoq efterskolimiinnermini angajoqqaatut oqartussaassuseqartunit toqqarneqarsimasunik ilaqutariinnik atassuteqarfeqassaaq, takuuk § 14.
- 5) Atuartoq siusinnerusukkut efterskolimiinnissamut tapiiffigineqarsimassanngilaq, taamaattoq takukkit imm. 4 aamma 5.

Imm. 2. Ilinniartitaanermut Naalackersuisoqarfiup immikkut ittutigut imm. 1, nr. 1-imi najugaqarnissamik piunasaqaat sanioqqussinnaavaa, tamatumani aamma assersuutigalugu atuartoq aamma angajoqqaatut oqartussaassuseqartut ukiuni arlaqartuni Kalaallit Nunaanni najugaqarsimappata, imaluunniit meeraq Kalaallit Nunaanni najugaqarpat aalajangersimasumik, ukiuni arlaqartuni najugaqarsimalluni, kisiannili angajoqqaatut oqartussaassuseqartut aalajangersimasumik nunami allami najugaqarsimallutik.

Imm. 3. Ilinniartitaanermut Naalackersuisoqarfiup immikkut ittutigut ukiuni 8-ni atuarsimanissamik piunasaqaat aamma atuartup 18-inik ukioqalersimannginnisaanik piunasaqaat sanioqqussinnaavai, takuuk imm. 1, nr. 2, tamatumunnga ilanngullugu ukiut 8-t ataallugit atuarsimaneq atuartup klassimik

alluisimaneranik peqquteqarpat, ukioqqortuallaarnerlu atuartup klassimik uteqqiisimaneranik allamilluunniit peqquteqarluni atuarnermi kinguaattoorsimaneranik peqquteqarpat.

Imm. 4. Ilinniartitaanermut Naalakkersuisoqarfiup immikkut ittutigut imm. 1, nr. 5imi piumasaqaat sanioqqussinnaavaa, tamatumunnga ilanngullugu atuartuq nammineq pisuussutiginnisaminik siusinnerusukkut efterskolernerminik unitsitsiinnarsimappat, imaluunniit naalakkersuisoqarfiup nalilerpagu efterskolernerup nanginnissaa atuartup ilinniaqqinnissamut periarfissaqalernissaanut pingaaruteqarluinnartoq.

Imm. 5. Atuartunut inunnut annertuumik innarluutilinnut ikiorsiisarneq pillugu malittarisassanut ilaasunut, imm. 1, nr. 5 apeqqutaatinnagu ukiut pingasut tikillugit tapiisoqarsinnaavoq.

Imm. 6. Ilinniartitaanermut Naalakkersuisoqarfik tapiissutinut tunngatillugu atugassarititaasussanik aalajangiisinnaavoq, tamatumani aamma atuartup ilisarititsiviusumik piareersaataasumillu pikkorissarnissaanut, takuuk § 4, imaluunniit atuartuq immikkut perorsaanikkut tapersorsorneqarnissamik pisariaqartitsisoq efterskolimiinnerminut atatillugu ikiorsiissutissanik pisinnaalluni, takuuk § 3.

§ 13. Efterskolimi akuerisaasumi ilinniartussatut akuerisaaneq uppernarsarneqassaaq tamanna pillugu efterskolip atsiukkamik allagaqarneratigut.

§ 14. Angajoqqaatut oqartussaassusillit ilaqutariinnik atassuteqarfissanik toqqaasimanagerat, takuuk § 12, imm. 1, nr. 4, uppernarsarneqarsimassaaq angajoqqaatut oqartussaassuseqartut aamma ilaqutariit atassuteqarfiusussat akornanni immersukkamik atsiukkamik nalunaaruteqarnikkut. Ilinniartitaanermut Naalakkersuisoqarfimmiit tamatumunnga atugassanngorlugu nalunaaruteqarnissamut immersugassiaq atorineqassaaq.

§ 15. Atuartuq efterskolimi najugaqarnissap aallartinnissaanut takkutinnitsoorpat, tapiissutisisarnissamut pisinnaatitaaffik atorunnaassaaq.

Imm. 2. Ilinniartitaanermut Naalakkersuisoqarfiup imm. 1 sanioqqussinnaavaa, atuartup efterskolip aallartinnerani takkutinnitsoornera pissutsinik immikkut ittunik akuerineqarsinnaasunik peqquteqarsimappat, tamatumunnga ilanngullugu tamanna ilaqutariinni peruluttoqarneranik angallannermiluunniit pissutsinik peqquteqarpat.

§ 16. Efterskolimiinneq maanaannaq taamaatinneqarpat tapiissuteqartarneq ullormit taamaattiffimmiit unitsinneqassaaq. Efterskole taamaatereernerup kingorna piffissami aalajangersimasumi efterskoliiminnerup akilerneqarnissaanik piumasaqarpat (taamaatinnermi akiliut), tapiiffigineqarnissamik pisinnaatitaaffik piffissami tassani pigiinnarneqassaaq, taamaattorli annerpaamik sapaatip-akunnerini 4-ni.

Imm. 2. Angerlamut angalanermut aamma pisariaqartumik unnuiffissanut nerisaqarnermullu aningaasartuutinik akiliunneqarsinnaaneq taamaallaat atuutissaaq, atuartuq angerlannginnermini Kalaallit Illuutaannit efterskolimut attuumassuteqartumit aqqiissuunneqartumik oqaloqatigineqaaqarsimappat. Oqaloqatigiinnermi qularnaarneqassaaq, ajornartorsiutinut uniinnarnermut patsisaasunut aqqiissutaasinnaasut tamarmik misilinneqarsimanissaat, tamakkununnga ilanngullugit atuartunut ataasiakkaanut ikiorsiissutit, takuuk § 1, imm. 1, nr. 8. Oqaloqatigiinneq atuartup efterskoliani pissaaq, atuartup efterskolernerminik unitsitsiinnarluni nalunaaruteqarnerata kinguninnguatigut. Oqaloqatigiinnermut peqataassapput Kalaallit Illuutaanni

sulisoq, efterskolimi sulisoq, atuartuq atuartorlu 18-it inorlugit ukioqarpat angajoqqaatut oqartussaataasut imaluunniit ilaqutariit atuartumut attaveqaataasut.

Kapitali 4

Qinnuteqarnermi periaatsit

Atuartunut annertuumik innarluutilinnut, aamma atuartunut angerlarsimaffiup avataani inissinneqarsimasunut immikkut ittut

§ 17. Atuartunut inunnut annertuumik innarluutilinnut ikiorsiisarneq pillugu malittarisassanut atuuttunut ilaasunut aamma atuartunut meeqqanik inuusuttunillu ikiorsiisarneq pillugu malittarisassat atuuttut naapertorlugit angerlarsimaffimmik avataanut inissinneqarsimasunut tapiissutit aatsaat tunniunneqarsinnaapput, efterskolernissaq isumaginninnermi oqartussaasunit susassaqartunit akuerineqarsimappat.

Atuartunut immikkut perorsaanikkut ikorfartorneqarnissamik pisariaqartitsisunut immikkut ittut

§ 18. Atuartut immikkut perorsaanikkut tapersorneqarnissamik Danmarkimi efterskolernerminnut atatillugu pisariaqartitsisut, kiisalu atuartunut taakkununga angajoqqaatut oqartussaassuseqartut ilitsersorneqarnissamik qinnuteqassapput atuartut atuarfigisaanut, efterskolimi tiguneqarnissamut atatillugu, ikiorsiissutinik pisariaqartitsineq qanoq ittuunersoq qularnaarumallugu.

Atuartunut tamanut nalinginnaasumik atuuttut

§ 19. Atuartunut § 17imi pineqanngitsunut tunngatillugu angajoqqaatut oqartussaassuseqartut namminneerlutik efterskolimut akuerisaasumut qinnuteqassapput.

Imm. 2. Atuartup efterskolimi akuerisaasumi ilinniartunngorsinnaaneraniq nalunaarut aamma ilaqutariinnit attaveqaataasartussanit uppernarsaat pigineqalerpata, Namminersorlutik Oqartussanit tapiiffigineqarnissamik qinnuteqaat Ilinniartitaanermut Naalakkersuisoqarfiup immersugassiaa atorlugu immersugaq nassiunneqassaaq.

Imm. 3. Qinnuteqarnermi immersugassaq Naalakkersuisoqarfiup quppersakkami innersuussaani nassaassaavoq. Skema immersugassaq immersorneqassaaq nassiunneqarlunilu atsiorneqarsimalluni angajoqqaatut oqartussaassusilinnit aqutsisumut Naalakkersuisoqarfimmiit toqqakkamut.

Qinnuteqaammut ilanngullugit nassiunneqassapput:

- 1) Efterskolip atuartup ilinniartunngorsinnaaneraniq nalunaarutaa, takuuk § 13.
- 2) Ilaqutariinnit attaveqaataasussanit uppernarsaat akuersissut atsiugaq, takuuk § 14.
- 3) Piffissap ingerlanerani najugarisimasat uppernarsaataat (historisk bopælsattesti).
- 4) Kuisinnermut uppernarsaat imaluunniit uppernarsaat alla angajoqqaatut oqartussaassuseqartut kikkuunerat pillugu.
- 5) Angajoqqaatut oqartussaassuseqartut cpr-normui, isertitat piffissamut atuuttumut paasiniarnissaannut atorneqartussat, taamaattoq takuuk § 32, imm. 2. Inooqataasup cpr-normua ilisimatitsissutigineqassaaq § 7, imm. 4 naapertorlugu qinnuteqarnermi.

6) Karakterinut uppernarsaat ukiut arfineq pingajuanni atuarsimanermut uppernarsaatit, takuuk § 12, imm. 1, nr. 2.

Imm. 4. Atuartoq § 17-imi pineqartunut ilaappat, ilanngullugu nassiunneqassaaq uppernarsaat pisortatut oqartussaasunit susasaqartuniit, atuartoq angerlarsimaffiup avataanut inissinneqarsimanersoq pillugu, meeqqanut inuusuttuaqqanullu annertuumik innarluutilinnut malittarisassat atuuttut naapertorlugit.

§ 20. Ilinniartitaanermut Naalakkersuisoqarfiup atuartup Danmarkimut angalanissaa aqqissuuttussaappagu, qinnuteqaat Naalakkersuisoqarfimmit toqqagaalluni allaffissornikkut suliamik ingerlatsisuusussamit tiguneqareersimassaaq 15. marts nallertinnagu, ukiumi efterskolernerup aallartiffigisassaani.

Imm. 2. Misissuiartorluni angalanissamut tapiiffigineqarnissamik qinnuteqaat Naalakkersuisoqarfiup toqqagaani allaffissornikkut suliamik ingerlatsisuusumit tiguneqareersimassaaq kingusinnerpaamik ulloq 1. Februar, ukiup efterskolerfiusussap aallartiffissaata siuliani.

§ 21. Ilinniartitaanermut Naalakkersuisoqarfiup efterskole nalunaarfigissavaa atuartumut tapiissutissat akuersissutigineqartut taakkualu akilerneqartarneranni periaasissat pillugit.

Imm. 2. Ilinniartitaanermut Naalakkersuisoqarfiup Danmarkimi Kalaallit Illuutaat sumiiffinni attuumassuteqarfigisaanni efterskolini ilinnialersussat pillugit ilisimatissavai.

Paasissutissiisussaaitaaneq aamma utertitsilluni akiliineq

§ 22. Angajoqqaatut oqartussaassuseqartut pisussaaffigaat atuartup efterskolernerminik unitsitiner, ilinniarfimmu allamut nuunera paasissutissallu allat tapiissutisiuarnissamut pingaaruteqartut pillugit Ilinniartitaanermut Naalakkersuisoqarfimmut nalunaarutigisarnissaat.

Imm. 2. Ilinniartitaanermut Naalakkersuisoqarfik pisinnaatitaavoq tapiiffigineqarnissamik qinnuteqaatip nalilernissaanut paasissutissat pisariaqartut tamaasa piniarnissaannut, tamatumani aamma isertitanut tunngasumik pissutsit, aammalu tapiissutisianik pisartagaqaannarnissamut pisinnaatitaanerup nalilersornissaanut. Naalakkersuisoqarfik isertitanut tunngatillugu paasissutissanik nalilersuinermi misiligutissanik misissuisinnaavoq, aamma paasissutissanik allanik, tapiiffigineqartarnermut pingaaruteqartunik, aamma tapiissutit annertussusissaannut.

§ 23. Naalakkersuisut piumasarisinnaavaat tapiissutit akilerneqarsimasut utertinneqarnissaat, imaattoqarpat:

- 1) angajoqqaatut oqartussaassuseqartut paasissutissanik eqqunngitsunik nalunaaruteqarsimappata, imaluunniit pissutsini allannguutinik tapiissutisarnermut pingaaruteqartunik ilisimatitsimanngippata,
- 2) tapiissutit pisassarinagit tiguneqarsimappata,
- 3) tapiissutit aningaasaliiffigineqartumut atorneqarsimanngippata,
- 4) efterskolernissaq aallartinneqarsimanngippat, angalanissaaq inniminnerneqarsimappat aammalu akilerneqarsimalluni, imaluunniit
- 5) atuartup efterskolimiinnera imatut sivisussuseqarsimappat efterskolerneq allartinneqarsimanani, taamaatinnerlu naammattunik tunngavilersorneqarani.

Angalanernik aqutsineq

§ 24. Ilinniartitaanermut Naalakkersuisoqarfiup atuartumut angajoqqaatut oqartussaassuseqartut isumasiortarlugit atuartup efterskolimut angalanissaa piareersartarpaa, taamaattoq takuuk imm. 3 aamma § 26, imm. 1.

Imm. 2. Ilinniartitaanermut Naalakkersuisoqarfiup atuartut Danmarkimut tikittarnerat ataqatigiissaartarpaa.

Imm. 3. Atuartunut angerlarsimaffiup avataani inissinneqarsimasunut tunngatillugu, isumaginninnermi oqartussat suliami susassaartut, atuartumut angajoqqaatut oqartussaassuseqartut isumasiortarlugit atuartup efterskolernissamut angalanissaa Danmarkimullu tikippat isumagineqarnissaa isumagissavaa.

§ 25. Kalaallit Illuutaata inissisimanermigut atuartup efterskolianut attuumassuteqartup angajoqqaatut oqartussaassuseqartut isumasioqatigalugit atuartup efterskolereernermini angerlamut angalanissaata piareersarnissaa isumagissavaa, taamaattoq takuuk imm. 2 aamma § 26, imm. 2.

Imm. 2. Atuartunut angerlarsimaffiup avataanut inissitanut tunngatillugu isumaginninnermi oqartussaasut pisinnaatitaaffeqartup angajoqqaatut oqartussaassuseqartut isumasiorlugit atuartup efterskolimit angerlarnissaa isumagissavaa.

§ 26. Angajoqqaatut oqartussaassuseqartut kissateqartut namminneq atuartup efterskoliliarluni angalanissaanik aaqquussinissamik, tamatuminnga angalanissaq sioqqullugu piffissaagallartillugu nalunaaruteqassapput, kingusinnerpaamillu 15. marts.

Imm. 2. Angajoqqaatut oqartussaassuseqartut nammineerlutik atuartup efterskolereernermini angerlarnissaanik isumaginninniartut, Kalaallit Illuutaannik tamanna pillugu ilisimatitsissapput, kingusinnerpaamillu angerlarnissaq qaammatinik 5-inik sioqqullugu.

Angalanermut aningaasartuutinik utertitsineq

§ 27. Angajoqqaatut oqartussaasut atuartup efterskolimut efterskolimiillu angalaneramik isumaginnittut, Ilinniartitaanermut Naalakkersuisoqarfimmit billetimut akikinnerpaamut, allanngortinneqarsinnaanngitsumut sillimatitaqanngitsumullu aningaasartuutitik uppernarsakkat utertillugit akilertissinnaavaat, tamatumani aamma angalanermi pisariaqartumik unnuinernut aningaasartuutit. Aningaasartuutit atuartumut namminermut angerlarsimaffiup Københavnillu akornanni angalanermut, kiisalu Danmarkimi aqqummut akikinnerpaamut aningaasartuutit naatsorsorneqassapput.

Imm. 2. Billetit akikinnerpaaq imaluunniit allanngortinneqarsinnaanngitsoq atorneqanngippat utertoortugineqarsinnaapput ullormi angalaffimmi billetip allanngortinneqarsinnaanngitsup akia angalanerulluunniit akikinnerpaap nalinga.

Imm. 3. Angajoqqaat Kalaallit Nunaanni mittarfeqarfimmut qaninnermut nammineerlutik angallassigunik aningaasartuutitik namminneq akilissavaat.

§ 28. Timmisartumut billetit suliarereernerisa kingorna allannginnermi aningaasartuutaanerujunnartut angajoqqaatut oqartussaassuseqartunit akilerneqassapput, tamanna angajoqqaatut

oqartussaassuseqartut angalanermik allannguinerannik peqquteqarpat.

Tapiissutit akilerneqartarnerat

§ 29. Efterskolimiinnerup akilernissaanut tapiissutit, takuuk § 7, akilerneqartarput efterskolimut pineqartumut qaammatikkaartumik. Tapiissutit annertussusiat allannguuteqarpat, takuuk § 7, imm. 9, tapiissutit allanngortitat akilerneqartassapput qaammatip isertitat tunngaviusut naatsorsorneqarfiata tullianiit.

Imm. 2. Tapiissutinik akiliisarneq atorunnaassaaq efterskolerneq unitsinneqarpat, taamaattoq takuuk § 16, imm. 1.

Maalaarneq

§ 30. Tapiissutit pillugit aalajangiinerit oqartussanut allanut maalaarutigineqarsinnaanngillat.

Kapitali 5

Atuutilernera, atorunnaarsitsinermi aamma ikaarsaariarnermi aalajangersakkat

§ 31. Nalunaarut 1. februaari 2017 atuuttuulerpoq, ukiumiillu atuarfiusumit 2017/2018-imi atuuttuulissalluni.

Imm. 2. Ilutigisaanik atorunnaarsinneqarpoq Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaat nr. 22, 23. december 2013-imeersoq.

§ 32. § 7 naapertorlugu ukiumi atuarfiusumi 2017/2018-imi tapiissutissanik naatsorsuinermi isertitat akileraaruserneqartut kingulliit ilisimaneqartut atorneqassapput.

Imm. 2. Ukiumi atuarfiusumi 2017/2018-imi tapiissutinik qinnuteqarnermi isertitat akileraaruserneqartut takussutissianngorlugit uppersaataat qinnuteqaammut ilanngunneqassapput.

Namminersorlutik Oqartussat, ulloq 20. januar 2017

Doris Jakobsen

/

Lone Nukaaraq Møller